


TEZAU LITURGIC

7 AUGUST

**SLUJBA
SF. CUVIOS
ANTONIE
PUTILOV
DE LA OPTINA**



**MINEIUL PE AUGUST
MOSCOVA**



Месяца августа в 7-й день
Попразднство Преображения
Господня и преподобнаго
Антония Оптинскаго

На велицей вечерни

На Господи, возвах: стихиры на 8, праздника 3 и
святаго 5, глас 2:

Приидите, людие Божии, / днесь прославим старца
Оптинскаго, / смирением братии послужившаго, / яко
крин сельный процветшаго / и добродетельми
возблагодарившаго, / и согласно воспоим ему: /
преподобне отче наш Антоние, / в райския сады ныне
преселивыйся / и тамо во блаженстве выну
пребываяй, / молися присно ко Господу, да спасет
души наша.

Приидите, монахов множество, / днесь почтим
память славнаго Антония, / Христа всем сердцем
возлюбившаго / и Того ради крепко подвизавшагося. /
Веселися ныне обитель Оптинская, / мощи

преподобнаго хранящи,/ яко адаманта предивнаго,/ подвигом добрым ты прославившаго.

Веселится ныне Церковь Русская/ и ликовствует воинство небесное,/ ублажающе подвиг жития преподобнаго:/ той бо слово евангельское исполняя,/ отвержесе воли своя/ и Подвигоположнику последова./ Темже, отче блаженне Антоние,/ моли Христа Бога о всех верою ты почитающих.

Приидите, вернии,/ предивнаго отца восхвалим,/ той бо, по слову аввы своего,/ из пустыни Оптинской во Малоярославец град прииде,/ идеже обитель монашескую устроив,/ яко пастырь добрый и отец чадолюбивый,/ неленостно стадо Христово упасл есть./ Темже, отче Антоние,/ не забуди нас, грешных,/ празднующих память твою.

Слава, глас б:

Божественными блистаньми весь озарился еси, преподобне Антоние,/ егда душа твоя, добродетелию смирения благоухаючи,/ храмина Духу Святому устроися,/ в нейже и сотвори Себе Господь обитель

достойную./ Темже, яко имея дерзновение ко Святей
Троице,/ моли спастися душам нашим.

И ныне, праздника.

Вход. Прокимен дне. И чтения три
преподобническая.

На литии стихира праздника и преподобнаго, глас 1:

Красото и славо Церкви Русския,/ святая пустынь
Оптинская!/ Воззри на славу чад твоих:/ святых бо
монахов собори ныне/ с Небес на тя умильно
взирают/ и вкупе со ангельскими лики/ преподобнаго
Антония достойно ублажают/ и мы, грешнии,
песнями духовными того величаем.

От родителей твоих благочестие унаследивый/ и
пути отческаго не уклонивыйся,/ поспешествующей
ти силе Божией,/ по Христе поспешил еси, Антоние,/
всегда имея в сердце Имя Его Святое,/ во еже выну
взывать:/ благослови, душе моя, Господа, и не
забывай всех воздаяний Его.

Слава, глас 8:

Почитая брата и духовнаго отца твоего,
прехвальнаго старца Моисея,/ искусен водитель душ

человеческих соделался еси,/ словом Божиим чад твоих питаю/ и Животворящих Таин приобщая./ Темже, богомудре отче Антоние,/ сподоби ны пребывати в благодати Божией/ и вкупе с тобою Имя Его прославляти.

И ныне, праздника.

На стиховне стихиры преподобному, глас 5:

Радуйся, преподобне Антоние,/ ты бо дом души своея/ на твердем камени заповедей Христовых добре устроил еси,/ егда же волны искушений на тя воздвизахуся,/ тогда непоколебим пребывал еси,/ Сам бо Христос Бог избра смиренное сердце твое/ и вселися в нем,/ яко в благоукрашенной храмине.

Стих: Честна пред Господом/ смерть преподобных Его.

Радуйся, обитель Оптиная,/ ты бо возрастала еси/ сонм мужей совершенных,/ в меру возраста Христова достигших,/ веру соблюдавших и конец достойный приемших./ Темже единого от них,/ преподобнаго Антония,/ память ныне совершаем,/ песненными похвалами ублажающе.

Стих: Блажен муж бояйся Господа,/ в заповедех
Его восхощет зело.

Радуются ныне монахов сословия,/ обрели бо суть
молитвенника чудна и предивна,/ преподобнаго авву
Антония,/ иже у престола Господня ныне предстоит/
и Владыку всех за ны молит./ Темже к нему
воззовем:/ не остави нас, грешных, в беззакониих
умрети,/ испроси нам у Милосерднаго Господа/
оставления грехов и прегрешений/ и душам нашим
веля милости.

Слава, глас 3:

Радуется днесь земля Калужская,/ из нея бо
произыде преподобный Антоний,/ иже, подвигом
добрым подвизався,/ в скиту Оптинстем, яко финикс
процвете/ и, плоды духовными чада своя питая,/
монахов множество ко Христу приведе./ Ныне же
Престолу Божию предстоит, глаголя: / се аз, Господи,
и чада моя,/ ихже милостивно приими, Благоутробне.

И ныне, праздника.

Тропарь, глас 1:

Укра­сил­ся еси, отче Ан­то­ние, сми­ре­ни­ем,/ бла­го­да­тию же очи ду­шев­ней прос­ве­тил еси,/ раз­суж­де­ние, яко верх доб­ро­де­тели, стя­жал еси,/ и по­слу­ша­ни­ем Бо­гу угодил еси,/ се­го ра­ди со уми­ле­ни­ем зо­вем ти:/ сла­ва Дав­ше­му ти крепость,/ сла­ва Прос­ла­вль­ше­му тя,/ сла­ва По­да­ю­ще­му то­бою нам ис­це­ле­ния.

На утрени

На Бог Господь: тропарь праздника дважды.
Слава, тропарь святого. И ныне, праздника.

По 1-м стихословии седален, глас 4:

Оп­ти­ны пу­сты­ни до­стой­ный на­сель­ни­че и тоя сла­в­ный под­ви­ж­ни­че, пре­по­доб­не отче Ан­то­ние, ты, сми­ре­ни­ем при­об­рет вы­со­кая и ни­ще­тою стя­жав бо­га­тая, в Не­бес­ный град до­стой­но все­лил­ся еси.

Слава, и ныне, праздника.

По 2-м стихословии седален, глас 4:

А­да­мову вет­хость низ­ло­жив, весь во Хри­ста об­ле­к­ся еси и, стра­сти плот­ския по­бедив, яко вер­ный

ученик Христов, жизнь вечную со святыми наследовал еси.

Слава, и ныне, праздника.

По полиелеи седален, глас 3:

Богомудрым оком сердца вышня блага созерцая, красная же и сладкая нижних презрев, в послушание брату твоему преподобному Моисею вдався еси, темже и Господь благослови тя даром разсуждения и стадо овец Своих, яко благоискусному наставнику, вручи. Монаси же, зряще тя в подвизах пребывающа, во благочестии утверждахуся и, яко отца чадолюбиваго, любовь почитаху.

Слава, и ныне, праздника.

Степенна, 1-й антифон 4-го гласа. Прокимен глас 4: Честна пред Господем/ смерть преподобных Его. Стих: Что воздам Господеви о всех, яже воздаде ми? Евангелие от Матфеа, зачало 43.

По 50-м псалме стихира, глас 6:

Яко звезда пресветлая,/ возсияша миру честныя мощи твоя,/ к нимже с верою притекающи/ обильно дарования приемлют,/ недугующии исцеляются,/

вернии благодатию Божиею утешаются./ Темже память твою ныне празднующе,/ молим тя, отче Антоние прехвальне,/ умоли Господа даровати нам/ мир и велию милость.

Канон праздника, с ирмосом на 6 и святого на 8.

Канон святого, глас 8.

Песнь 1

Ирмос: *Воду прошел, яко сушу,/ и египетскаго зла избежав,/ израильтянин вопияше:/ Избавителю и Богу нашему поим.*

Мысленнаго фараона послушанием воли Божией потопив, прешел еси от смерти в живот вечный и, победный венец от Господа прием, Небесных обителей достигл еси.

Ризою молниевидною одеаяся, преобразил еси лик души своея в подобие Христово, и пред ученики своими просиял еси светом нетленным, темже в Царствии Света присно пребываеши.

Еленю жаждущему уподобляяся, к источнику воды животныя припал еси и Словом Божиим жажду сердца твоего утолил еси. Ныне, святе Антоние,

наслаждаешься в Царствии Небесном даров нетленных.

Студное рубище ветхаго жития отринув, в белыя ризы безстрастия одеялся еси, непрестанно имя Бога нашего прославляя, Имже светло прославлен еси.

Богородичен: Ороси Тя Дух Святый и зачала еси во утробе Бога, к Немуже тепле пролей молитву Твою, Преславная Богородице, да дарует ми благодать и слезное покаяние.

Песнь 3

Ирмос: *Ты еси Утверждение/ притекающих к Тебе, Господи,/ Ты еси Свет омраченных,/ и поет Тя дух мой.*

От юности Господа взыскупя, в пустыню удалился еси, древнему Антонию подобяся, темже и достигл еси Царствия Отца Небеснаго.

Помышления сердца своего прилежно обновив, яко незлобивый младенец, любовию ко Христу прилепился еси, преподобне, во вся дни и нощи хвалу Тому совершая.

Благочестие возлюбив, честный отче, к Богу всем сердцем устремился еси, страсти воздержанием, помыслы же исповеданием усмирив, к животу бессмертному прешел еси.

Ночь греховную земного жития миновав, Света Невечернего во дни нескончаемым достигл еси, идеже Троицу Святую воспеваеши непрестанно.

Богородичен: Безконечно согрешающе, на милость Твою надеемся и молим Тя: вознеси молитвы Твоя о нас ко Господу, Мати Пречистая.

Кондак и икос праздника.

Седален преподобному, глас 3:

Изведи нас из плена греховного, отче Антоние прехвальне, ты бо сети вражия нетрудно избегл еси и злобу бесовскую невредно угасил еси. Помози же ныне нам, немощным, яко добля игумена чтущим тя.

Слава, и ныне, праздника.

Песнь 4

Ирмос: *Услышах, Господи,/ смотрения Твоего Таинство,/ разумех дела Твоя/ и прославих Твое Божество.*

Руце свои на рало возложив, николиже вспять обратился еси, преподобне, и в Небесное Царство по слову Божию управлен был еси. Помози и нам тебе последовати.

Христа Бога, Егоже возлюбил еси всем сердцем твоим, и всею душою, и всем разумением, с Ним и ныне пребываеши, боголюбче. Испроси и нам молитвою твоею Того Единого любити во вся дни живота нашего.

Плевелы греховных помыслов исторгая, ниву сердца своего неленостно возделал еси, отче Антоние, от неяже добрыя класы в пищу духовную чадом твоим предлагал еси.

Любовию Божественною уязвився, в подвизах мнозех преуспел еси, святе, мы же, тобою наставляеми, Христа всем сердцем любити навыкохом.

Богородичен: Адскую крепость попрала еси Рождеством Твоим, яко родила еси Бога, адовы вереи сокрушившаго, темже молим Тя, Богородице, помози нам от греховных уз свободитися.

Песнь 5

Ирмос: *Утренююще вопием ти:/ Господи, спаси ны,/ Ты бо еси Бог наш,/ разве Тебе иного не вемы.*

Путь узкий избрав, преподобне, воздержанием и постом тело свое утеснил еси, темже и достигл еси в широту Небесную, греху неприступную.

Нищету духовную возлюбив, Духом Святым обогатился еси и, яко премудрый купец, к Небесному сокровищу всем сердцем прилежал еси.

Единаго на потребу взыскуя и по подобию Божию душу свою устрояя, сердечныя чистоты евангельски достигл еси, преподобне, темже и Христа лицезрети сподобился еси.

Антонию тезоименитому подражая, нападение бесов молитвою отражал еси, богомудре, иже, не терпяще Имене Иисусова, яко таяй воск от лица огня, вспять бежаху.

Богородичен: Яко Нива Неоранная, Богородице Дево, Клас Живота нетленно прозябла еси, темже Тя, яко Питательницу жизни нашея, православно величаем.

Песнь 6

Ирмос: *Молитву пролию ко Господу,/ и Тому
возвещу печали моя,/ яко зол душа моя исполнися,/ и
живот мой аду приближися,/ и молюся, яко Иона:/
от тли, Боже, возведи мя.*

Таинниче Божия благодати и теплый наш
предстателю, услыши убо глас наш и помози
молитвами твоими, да избавимся от тли греховныя.

Одолол еси в лютей брани змия древняго и, яко
победитель, венцем победным от Господа венчался
еси. Помози убо и нам в духовней брани устояти,
воине Христов прекрепкий.

Нужду имамы в молитвеннем предстательстве
твоем, преподобне отче, по вся дни в мысленней
брани и страстех пребывающе, окаменением бо
греховным души наша отяготеша.

Ионе пророку уподобихомся непослушанием воли
Божией, темже и низверженнии, вопием: от тли,
Боже, возведи нас молитв ради Антония
досточуднаго.

Богородичен: Елей милости пролей, Богородице, на грешную мою душу, зело бо уранена от мысленных врагов и грехми изъязвлена есть премного, и спаси мя, раба Твоего.

Кондак, глас 7:

Преподобне отче Антоние,/ сердцем младенствуя,
Богу пел еси,/ разумом старец быв,/ юныя наставляя
еси,/ духом высок,/ пред отцы и братиею себе умалил
еси,/ верный же в малом,/ ныне велик в Царстве
Божием наречен еси,/ яко ты еси воистинну Оптины
похвало.

Икос:

Вертограда Оптинского прозябение,
скитоначальниче мудрый, не желал еси славы земныя,
но начальство смирением растворял еси и, тяготы
грешных во всю жизнь нося, многи скорби претерпел
еси, праведне. Сего ради помози и нам, премудрый
наставниче, да не бежим трудов доброделания, но,
веселыми ногами к Свету Невечернему идуще, Пасхи
Небесныя достигнути возможем и тебе

благодарственно воспоем: преподобне Антоние, ты еси воистинну Оптины похвало.

Песнь 7

Ирмос: От Иудеи дошедше отроцы,/ в Вавилоне иногда,/ верую Тройческою пламень пещный попраша, поюще:/ отцев Боже, благословен еси.

Иноческия добродетели стяжав, огонь страстей молитвами твоими угасил еси и, якоже отроцы в пещи не опалившися, Богу воспевал еси: отцев Боже, благословен еси.

Яко муж искусен во бранех духовных, враги безплотныя щитом веры отражал еси и, любовью ко Христу пламенея, молитвенне взывал еси: отцев Боже, благословен еси.

Из челюстей ада исхити ны, грешныя, пламенем страстей опаляемья, да вкупе с тобою благодарне воспоем: отцев Боже, благословен еси.

Богородичен: Просвети очи сердца моего, Благословенная Владычице, да узрю Христа Бога и Тому возопию: отцев Боже, благословен еси.

Песнь 8

Ирмос: *Богоглаголивии отроцы в пеци,/ со огнем
пламень попирающе, пояху:/ благословите, дела
Господня, Господа.*

Огнь Божественная благодати озари клеть сердца
твоего, преподобне, облак же светел над келиею твоею
узревше, возопиша людие: благословите, дела
Господня, Господа.

Присно горе устремляясь, болезнь тяжкую
превозмогал еси, по вся дни в молитве Богу предстоя
и вопия: благословите, дела Господня, Господа.

Отче Антоние преподобне, ты, многоболезненному
Пимену Печерскому подобяся, со светлым лицом
безропотне тридесять лет болезнь свою претерпевал
еси, Бога в Троице прославляя.

Богородичен: Лучами Невещественнаго Солнца
озаряеми, благодарим Тя, Дево Всепетая, Ты бо,
Солнце Мысленное, Христа, родила еси, миру Единого
Спасителя.

Песнь 9

Ирмос: Устрашися всяк слух,/ неизреченна Божия
снизхождения,/ яко Вышний волею сниде даже и до
плоти,/ от Девическаго чрева быв Человек./ Темже
Пречистую Богородицу, вернии, величаем.

Упокоився вкупе с братом и отцем твоим
духовным, преподобным Моисеем, ныне со Христом
беседуеши, отче Антоние, мы же утешаемся у святых
мощей твоих, от них бо приемлем исцеление.

Святителя Митрофана почитателю, во едином дни
с ним и прославляеши, той бо повеле тебе
трудиться и молиться неленостно: темже ныне в раи с
ним веселишися и от мощей своих исцеления нам
источаеши.

Источаются токи благодатныя от честныя раки
твоея, отче Антоние, ты бо недугующих исцеляеши и
страсти грешников врачуеши, сердца верных
любовию возвеселяя.

Богородичен: Превыше ангельских ликом
почтенную, Тя, Пречистая, воспеваем и, яко

Богородительницу, ублажаем, не отрини, Мати, нас, грешных, но к Царствию Божию путевождствуй.

Светилен:

Возсия в сердце твоём Свет Невечерний, отче Антоние, к Нему же единому от юности всем помышлением устремлялся еси, темже и ныне на Небесех во Христе ликуеши.

Слава, и ныне, праздника.

На хвалитех стихирь праздника 3 и святаго 3, глас 8:

Богомудре отче Антоние,/ ты премудростию Божиею мудрость князя века сего посрамил еси/ и вся того немощныя дерзости терпением победил еси,/ темже ублажаем память твою,/ славяще Бога, дивнаго во святых Своих.

Богоносне отче Антоние,/ ты обитель Духа Святаго быв/ и любви крылома чад своих осеняя,/ многия ко Христу привел еси./ Темже ныне награду велию имаши во Царствии Небеснем.

Боголюбиве отче Антоние,/ ты Христа всем сердцем возлюбил еси/ и, в послушании брату твоему Моисею усовершився,/ кротость сердца стяжал еси./

Темже днесь светло празднуем/ и, к раце мощей твоих (*иконе твоей*) припадающе, взываем:/ О собеседниче ангелов кроткий, предстоя Христу,/ моли о спасении душ наших.

Слава, глас 6:

Постом и бдением увядивый плоть свою/ и молитвою непрестанною к Богу устремляясь,/ яко орел, на крилех смирения и послушания,/ в Небесная воспарил еси,/ идеже любви Божественныя наслаждаясь,/ поминай нас, чтущих святую память твою,/ отче наш блаженне и милостиве.

И ныне, праздника.

На литургии

служба праздника и преподобному.

[Священный Синод на заседании 16-17 июля 2020 года (журнал № 34) утвердил к общецерковному богослужебному употреблению текст службы преподобному Антонию Оптинскому]

